

Die Pad van Waarheid tot die Lewe  
Bybel VertalingsProjek

**Bespreking van die wet**

2

**Wettiesheid teenoor gehoorsaamheid**

## Wat is wettiesheid?

1. Om te dink dat ek enige iets kan byvoeg by die volkome verlossing van Yeshua deur die doen van wette.
2. Gehoorsaamheid aan die letter van die wet sonder om die waarheid daarvan te aanvaar of te vertrou.
3. Die glo in die wet, sonder om dit te doen.
4. Om 'n wet vanuit my eie oortuigings te skep en dit dan op ander toe te pas.
5. 'n Nuwe wet van wetloosheid – “Die wet het verbygegaan!” “Ek is nie onder die wet nie!”

**Al hierdie is teen en breek die Torah – geskrewe wet (leringe of instruksies) van God. Of die wet nou geskryf is op papier, 'n boekrol of op die verstand, wil en emosie of in my Gees – dit is steeds die wet van God.**

Lees weer die vorige sin en besin, dink, bid oor die kosekwensies daarvan. Terwyl jy weer daarvoor besin wil ek net 'n duidelike onderskeid tref – dit praat van die Wet van God – nie van die wet van mense, Rabbi's, Interpretasies, Genootskappe, Teologieë, Tradisies of Opinies nie. Slegs en alleen die wet wat God self vir ons gegee het op skrif, geskryf deur Moshe en opgesom deur die hand van God self op kliptafels.

**DIT IS DIE WET VAN GOD.**

Hierbo is 5 stellings oor wat wettiesheid is – met ander woorde – maniere wat nie die regte manier is om met die wet om te gaan nie. Baie van ons het ‘n sekere deel van hierdie metodes iewers in ons leringe en teologie. Dit is wat God van ons vra om van ontslae te raak. Kom ons kyk na die 5 stellings.

## 1

Om te dink dat ek enige iets kan byvoeg by die volkome verlossing van Yeshua deur die doen van wette.

**Rom 6:10** “Hy wat dood is vir die sonde, het een maal gesterf en omdat Hy leef, leef Hy vir God.”

**Rom 6:8** “As ons daarom saam met Die Gesalfde Een dood is, laat ons vertrou dat ons saam met Die Gesalfde Een sal lewe,”

As ek die twee verse saamvat – kyk of my denke sin maak: Hy het eenmaal finaal gesterf – Hy het dit klaar gedoen, daar is niks meer oor om te doen nie - Ons is saam met Die Gesalfde Een dood – ons het dus ook niks meer te doen aan die betaling van ons sonde nie, want Hy het dit namens ons gedoen – Die lewe wat Hy nou leef (Nadat Hy vir ons sonde gesterf het) leef Hy vir God – Ek moet leef soos Yeshua - 1 Yog 2:6 – Die lewe wat ek nou dus leef, leef ek vir God – Ek gehoorsaam met ander woorde God se opdragte, want dan leef ek vir God – My sonde is reeds betaal – Ek leef in gehoorsaamheid.

## Neem tyd en bestudeer en bedink dit mooi.

Laat toe dat die betekenis hiervan deur die Gees van God in U vasgemaak en bevestig word.

Nou is daar mos geen stryd tussen die twee nie – ek probeer nie weer betaal vir my sonde nie, maar ek is gehoorsaam aan Hom, want ek het Hom lief.

**Yeshua het gesê: - Yog 14:15** “As julle My liefhet, voer voortdurend My opdragte uit.”

U moet dit die heel tyd in gedagte hou – jy mag niks doen om God te probeer help met jou verlossing of om daarvoor te betaal nie.

**Gal 2:16** “weet dat die mens nie onskuldig verklaar word vanuit die doen van die geskrewe wet nie, maar deur die vertrouenswaardigheid van Yeshua, Die Gesalfde Een.

Ons het ook in Die Gesalfde Een, Yeshua, vertrou sodat ons onskuldig verklaar kon word vanuit die vertrouwe van Die Gesalfde Een en nie vanuit die doen van die geskrewe wet nie, omdat uit die doen van die geskrewe wet geen mens onskuldig verklaar sal word nie,”**Ps 143:2**

**Gal 5:4** As jy onskuldig verklaar wil word deur die wet, is jy afgesny van Die Gesalfde Een. Julle het weggeval van die onverdiende guns af, 5 want dit is deur die Gees, vanuit vertrouwe, dat ons ‘n aktiewe verwagting het tot onpartydigheid en opregtheid, 6 want in eenheid met Die Gesalfde Een, Yeshua, is nòg die besnydenis nòg die onbesnedenheid enige iets, maar vertrouwe wat deur liefde volmaak gemaak is.

**1 Kefa 2:24** “Hy het al ons sondes in Sy liggaam op die kruishout opgelig en as ons dood is aan sondes, sal ons in Sy onpartydigheid en opregtheid lewe. Deur Sy wonde is julle gesond gemaak,”

Daar is ‘n resultaat op hierdie volkome verlossing en ‘n teken van die wedergebore Gees wat nou in gehoorsaamheid wil lewe. Ons doen dinge omdat ons God liefhet en wil gehoorsaam, nie omdat ons wil betaal vir wat ons ontvang het nie. Ek glo dit is ondankbaarheid teenoor God se verlossing om nie volkome gehoorsaam te wees aan Sy opdragte nie.

Is jy gehoorsaam? 100%

2

Gehoorsaamheid aan die letter van die wet sonder om die waarheid daarvan te aanvaar of te vertrou.

‘n Mens kan elke enkele wet gehoorsaam (behalwe, deur veronderstelling, die wet van vertrou), maar as hierdie dinge gedoen word sonder die hartsoortuigende vertrou in die enigste God wat daar is, die God wat Sy Seun, Yeshua, gestuur het om die versoening vir sonde te wees, is alles tevergeefs.

**Gal 3:1,2:** “O, dwase Galatiërs, wie het julle laat uitval, want let op, soos Hy voor julle oë as die Ambagsman uitgebeeld is, Yeshua, Die Gesalfde Een, toe Hy gekruisig is, 2 wil ek alleen dit van julle weet: Het julle die Gees ontvang vanaf die doen van die geskrewe wet of vanaf die vertrouwe in wat julle gehoor het? ”

Volgens Torah, is al hierdie uitwaartse “gehoorsaamheid” haatlik voor God, en die persoon wat dit doen, die werkheilige, “leef onder ‘n vloek,” want hy “doen nie alles wat in die boekrol van die Torah geskryf staan” nie (**Gal 3:10**).

Hy “doen” nie die vertrouwe wat alle doen en late moet motiveer nie: “Meer nog, sonder vertrouwe is dit onmoontlik om Hom tevrede te stel, want hy wat na God toe gaan, moet vertrou dat Hy Is en ‘n Beloner is van dié wat Hom soek.” **Hebr 11:6**

Die tweede deel van **Rom 14:23** “..alles wat nie uit vertrouwe is nie, is sonde.” Dit lei tot **Gal 3:13** “Die Gesalfde Een het ons losgekoop vanuit die vloek wat staan in die wet **Deut 27-28** deur vir ons ‘n vloek te word, want daar is geskryf: “Vervloek is elkeen wat aan ‘n hout hang,” **Deut 21:22-23** - ons is vrygekoop van die vloek van die wet – nie die wet self nie.

Die wet is op papier (klip) gegee en as onmiddellike strafbare opdragte, totdat dit deur Yeshua die Gesalfde Een op die hart geskryf kon word – in die Gees van die mens. Die godsdienst van “doen dit, want God sê so” word ‘n verhouding van “wil dit doen om Sy ontwil.”

Die manier waarop ons na die wet kyk verander – nie die wet nie. Die manier waarop ons op die wet reageer verander – nie die wet nie. Vrees vir straf is vervang met liefde. “Moet” word “wil”. “Ek steel nie, want ek sal dan die wet verbreek” word “Ek steel nie, want ek is te lief vir die persoon om sy goed te wil vat.” Dit is volledig gemaak in betekenis en waarde deur Yeshua.

### 3

Die glo in die wet sonder om dit te doen.

**Ya’akov 1:22** Wees ‘n doener van die boodskap en nie net ‘n hoorder wat jouself mislei nie, 23 want as iemand ‘n hoorder van die boodskap is en nie ‘n doener nie, is hy soos ‘n man wat sy gesig in ‘n spieël sien, 24 want hy sien homself en gaan weg en vergeet hoe hy was, 25 maar elkeen wat diep insien in die volmaakte wet van vryheid en daarin volhard, omdat hy nie ‘n vergeetagtige hoorder is nie, maar ‘n doener van die daede, sal geseënd wees in wat hy doen.

**Ya’akov 2:8** “As julle die geskrewe wet van God hierin uitvoer soos dit geskryf is: Jy moet jou naaste liefhê soos jouself, dan doen julle goed,”

**Ya’akov 2:14** “Wat is die voordeel, my broers, as iemand sê dat hy die ‘geloof’ het, maar hy het nie die daede nie? Kan sy ‘geloof’ hom red?”

**Ya'akov 2:17** “Net so is ook die ‘geloof’, as dit geen daad het nie, in sigself dood,  
18 want iemand sê vir jou: Jy en ek het ‘geloof’; ek het werke. Wys my jou ‘geloof’  
sonder daad en ek sal jou my vertroude deur my daad wys.”

Ek dink nie enige een van ons kan met die gedeeltes argumenteer nie ek bly dus daarby  
– sonder doen van (werke) is die ‘geloof’ net dooie woorde en leeg.

**Hoe kan mense jou woorde glo as jy Sy wet oortree?**

4

Om ‘n wet vanuit my eie oortuigings te skep en dit dan op ander toe te pas.  
Dit is vir my ‘n uitgemaakte saak – As die Lewende Skepper God dit gesê het is dit  
**DIE WET VAN GOD.**

Dit is die wet wat ek moet nakom. Mense se opinies en aanlassings is nie God se wette  
nie. Al is hy Rabbi of Pous!

**1 Kefa 4:1,2** “As Die Gesalfde Een daarom in julle plek na die liggaam gely het, het  
julle ook dieselfde gesindheid verkry: dat elkeen wat aan sy vleeslike liggaam gesterf  
het, opgehou het met alle sonde, 2 om gedurende die tyd wat hy in die vlees is, nie meer  
volgens menslike begeertes te leef nie, maar volgens die wil van God,”



**Kol 2:8** “Wees versigtig dat niemand julle beroof deur filosofieë en leë misleiding nie; volgens die leringe van mense en volgens die beginsels van die wêreld en nie volgens Die Gesalfde Een nie,”

**Mark 7:6-9** “Hy antwoord en sê vir hulle: “Yesha’yahu het reg geprofeteer oor julle, toneelspelers van ‘n vals karakter, soos geskrywe is: ‘Hierdie volk eer My met die lippe, maar hulle gedagtes en wil is ver van My af 7 en verniet vereer hulle My deur leringe te leer wat opdragte van mense is,’ 8 want julle verwerp die opdragte van God, maar behou die tradisies van mense: die seremoniële was van potte en bekere en baie ander dinge, dit doen julle.” 9 Hy sê vir hulle: “Julle verwerp wel die opdragte van God om sodoende julle tradisies te bevestig,

Dit is duidelik – leerstellings van groepe en mense, oorleweringe of tradisies, niks is DIE WET VAN GOD, as Hyself dit nie beveel het nie.

## 5

’n Nuwe wet van wetloosheid – “Ek is nie onder die wet nie!” of “Die wet het verbygegaan!”

**Rom 10:4** want die einddoel van die geskrewe wet is Die Gesalfde Een tot onpartydigheid en opregtheid aan elkeen wat vertrou,

## Let op die vertalings verskil.

Die woord wat ek baie hoor is: 'n Sekere deel van die wet is geldig – die tien gebooie (Morele wette) is nog geldig, maar die seremoniële wette het weggeval. As dit so was, is dit interessant dat die mense wat so sê ook nie eens die 4 de gebod van die tien gebooie nakom nie asof hy ook verval / verander is – nou watter wette is dan nog geldig?

Die wet is 'n eenheid – dit is alles een – as ek dus een breek, breek ek almal – Ek breek **die** Wet – nie 'n deel daarvan nie.

**Ya'akov 2:10-11** "Wie ook al die hele geskrewe wet gehoorsaam, maar in een ding struikel, word deur die hele wet skuldig bevind, 11 want Hy wat gesê het: Jy mag nie egbreuk pleeg nie, het ook gesê: Jy mag nie moord pleeg nie. As jy nie egbreuk pleeg nie, maar moord pleeg, het jy 'n oortreder van die geskrewe wet geword."

**Lev 4:2** "Praat met die kinders van Yisra'el en sê: 'As iemand in swakheid sondig in een van al die gebooie (wette / opdragte) van יהוה en een van die dinge wat nie gedoen mag word nie, tog doen...'"

Daarom val of alles weg of niks. Die offer wette kon nie wegval en die sg. morele wette is steeds dieselfde nie. Dit is die sleutel tot die verstaan van ons verhouding tot die Wet. Indien ek nog steeds een van die 10 Gebooie moet gehoorsaam, moet ek al 1000 die wette van die Bybel gehoorsaam. Indien ek nie een van hulle hoef te doen nie – hoef ek geen wet te doen nie. Dit is al wanneer ek kan verklaar dat die wet ('n sekere wet) nie meer vir my geldig is nie.

As ek dus sê dat al die wette verval het, moet ek besluit of ek met ander woorde alles mag doen wat ek wil. Besluit self: Mag ek steel – moord pleeg – hoereer – ander gode dien – God se eie Naam gebruik soos ek wil – enige dag as Shabbat hou? Daar is iets vreesliks fout met hierdie gedagtegang.

**Asseblief stop hier en dink oor wat ons sê!**

As die Bybel reg is,

**DIT GLO EK ABSOLUUT**, dan het ons geen ander afleiding as dat alles nog geldig is nie.

**STOP – luister asb. eers klaar.**

Ek moet nog steeds offers bring!?! Ja – maar ek hét dit reeds gebring en bring dit steeds deur die aanvaarding en opneem van die offer van Yeshua - Eens en vir altyd !!

**Rom 6:4-11** “Ons is saam met Hom begrawe in die doop tot die dood sodat net soos Die Gesalfde Een uit die dood uit opgestaan het deur die Gemanifesteerde Teenwoordigheid van Sy Vader, ons ook net so in ‘n nuwe lewe kan leef, 5 want as ons een geword het met Hom deur dieselfde dood as Hy, sal ons ook een wees met Hom in dieselfde opstanding as Hy. 6 Ons weet dat ons ou mens saam met Hom gekruisig is sodat die liggaam van die sonde vernietig sou word sodat ons nie langer ‘n slaaf van die sonde sal wees nie, 7 want hy wat dood is, het homself van die sonde bevry.

8 As ons daarom saam met Die Gesalfde Een dood is, laat ons vertrou dat ons saam met Die Gesalfde Een sal lewe, 9 omdat ons weet dat Die Gesalfde Een opgestaan het uit die dood en nie weer sal sterf nie en die dood het geen outoriteit oor Hom nie. 10 Hy wat dood is vir die sonde, het een maal gesterf en omdat Hy leef, leef Hy vir God. 11 Net so moet julle ook julleself beskou as dood vir die sonde en dat julle leef vir God in eenheid met ons Meester, Yeshua, Die Gesalfde Een.

So ook die vredesoffer – Hy is die Prins van Vrede (Yes 9:6). Ons het eintlik meer tyd nodig om te deel oor hoe God dink oor die wet, maar ek vertrou Sy Gees sal hierdie wonderlike openbaring vir jou oopmaak. Yeshua is die volledige plaasvervangende offer van al 5 die offers. As ek dan nie aan die wet onderworpe is tot gehoorsaamheid nie – hoekom ry jy nog aan die linkerkant van die pad? Selfde rede – dit is vir jou beswil. As dit so is, wat is dan die regte manier waarop die wet gesien en hanteer moet word?

Wat sê God self?

Ek vra jou om asseblief self na elkeen van die gedeeltes te gaan kyk – dit is God se opinie wat tel.

**Mat 5:17** “Moenie dink dat Ek gekom het om die Wet of die Profete te vernietig nie. Ek het nie gekom om te vernietig nie, maar om volledig te maak, 18 want dit is waar wat Ek vir julle sê: ‘Totdat die hemel en die aarde verby sal gaan, sal nie een ‘yud’ of een ‘strepie’ van die wet verbygaan, voordat dit alles klaar gebeur het nie.’

19 Enige een, wat daarom aan een van die minste van hierdie opdragte ongehoorsaam is en ander só leer, sal die minste genoem word in die Koninkryk van die hemel, maar elkeen wat dit doen en leer, hy sal groot genoem word in die Koninkryk van die hemel,

**Luk 16:17** “maar dit is makliker vir die hemel en die aarde om verby te gaan as dat een strepie van ‘n letter van die wet sou wegval.”

**Yeshua het gesê:**

“As julle My liefhet, voer voortdurend My opdragte uit!!”

**Yog 14:15**

Dit is waar, maar is die wet dan nie net vir die Jode gegee nie?

**1 Kron 16:14** Hy is יהוה ons God; Sy wet is in die hele aarde.